



QUÆSTIO MEDICA.

QUODLIBETARIIS DISPUTATIONIBUS,
manè discurtienda in Scholis Medicorum, die Jovis
decimâ-sexâ Februarii.

M. JOANNE ROBERT, Doctore
Medico, Præside.

*An unquam incipientibus internis inflammationibus Mochlica,
& hypnotica ex opio, phlebotomia præferenda?*

I.

SANGUINEM esse Naturæ thesaurum apud omnes est in confesso; eo se tuetur, fovet, ac sustinet; eo defraudata perit: sed hunc esse quamplurimorum & acutissimorum morborum parentem, vix unusquisque potest in animum inducere suum. Quanquam enim purus & laudabilis existat, si exuperet, & eo divites tum venæ tum arteriæ turgeant, suis hisce corpus virtutibus oneratum, sæpe procumbit: tanta quippe moles vitio datur, vix à naturâ gubernari potest, illiusque magisterio subijci; prodit sæpenumero extra præscriptos limites, & provocat vomitum ictumque sanguinis, aliaque mala circumgerit hæc luxuries, quæ in gravia pericula præceps ferri solet. Si à nativa indole sit degener, & putredinis vitio inficiatur, ut est alimenti pars optima, admodum purgata & elaborata; sic immutatus, horror est! quantas strages edere soleat, quam dira parere symptomata, sive in vasis resideat clanculùm sæviens, sive ex iis effusus in locum aliquem, & hinc exitu prohibitus, authorem se præbeat cladis & ruinæ partium, quarum réexperts crebrò consequitur. Hinc jure exploditur eorum opinio, qui sanguinem nunquam redundare, Naturam vitæ magistrā & ducem nunquam nimium conficere & continere, nec in locis sibi naturaliter destinatis putredinem concipere posse, & sanguinis morientis charactere indui, obfirmatè pronuntiant.

QUI φλεγμονὰς seu inflammationes progignit humor, sanguis est; & reus & author hujus incendii, ad partem aliquam appellens, ibique stationem parans, in illius exilioribus vasis effervescit, & flammam concipit: tunc æstus immodicus percipitur, febris emicat, jactatio corporis non mediocriter fatigat ægotantem, urinæ flammæ & acres redduntur, dolor perſentitur plus minusve habita ratione partis læsæ, cujus est obtusus aut exquisitus sensus. Sanguis autem ille rarò sincerus est, at sæpenumero biliosus; frequenter quoque depravatur, necnon permiscetur succis excrementitiis, quorum occurſu & commercio deterior evadit, & novam malitiæ labem adipiscitur, funestam sæpè, si partem nobilem tetigerit, peccaverit æger novo vivendi errore, deliquerit in remediorum usu, Medicus suo rectè non functus fuerit officio, in quem sæpè culpa rejicitur; jure, an injuriâ? tunc enim opus est celeritate, & absque ulla procrastinatione, ea veniunt in usum præsidia, non quidem quæ hosce æctus efferos irritare & accendere valent, sed quæ dotibus nobilioribus instructa, eorum causam pessumdare & circumcidere apta sunt, magno ægotantis bono & solatio, verâ & solidâ Medentis gloriâ & ornamento.

I I I.

MΟΧΛΙΚΑ' medicamenta, qualia vulgo circumferuntur Elleborus, granum cnidium, Colocynthis, Scammonium, elaterium, gratiola, stibium &c. sursum aut deorsum, aut utroque modo è distantissimis regionibus humores extorquent, pleraque absque ullo delectu: calore intenso pollent, omnia valdè urunt, & viscera, sanguinem, & spiritus inflammare perhibentur. Opium quoque, quod liquor est lacteus ex papaveris scapo leviter inciso elicitus, recentior Ætas, admodum attenta & sagax in indagandis Naturæ mysteriis, esse impensè calidum audet asserere, & perspicuè demonstratur insigni quo pollet amaro, odore gravi & viroso nares feriente, quod facile flammam concipit candelæ admotum, quod devoratum ardore & acrimoniâ fauces accendit, linguam vellicat, sitim promovet, instigat ad venerem; censeturque pars ejus oleosa sive sulphurea esse subjectum virtutis illius soporiferæ, quæ ipsi naturaliter insita est, sicut quid simile vino ingenitum est, cujus spiritus totus flammæus soporem ebrietatemque conciliat. Ne vero putes famosum laudanum opio puro & nativo pretiosius esse; quo diligentius

præparatur, eo debilius evadit, parte opii admodum expetendâ fugiente & exhalante. Facultates quoque tum catharticonum tum hypnoticonum, ne quæras extra eorum proprietates, quæ perinde ac in cardiacis, hepaticis, splenicis distinguuntur à ceteris dotibus quas possident. Quam benè mereretur de Medicinâ, quisquis (absque ostentatione) innatas medicamentorum vires naturâ suâ involutas, artis suæ operâ evolueret & manifestaret: sed verendum, ne sapiat ille ut pauper Alchymista, qui divitias, quas non exhibet, omnibus pollicetur.

I V.

LUDIT de corio humano, & Naturam insectari non morbum videtur, quisquis primis internarum inflammationum temporibus Mochlica præscribit. Si etenim ingens crimen est in acutis statim initio purgare, nisi materia turgeat, quod sit *ὀλίζατος*, ac ferè nunquam, idque opus moliri debeant Medici *περὶ ζωναν σαρκος*; multo atrocius esset tunc temporis effrenatorum horumce purgantium usum insinuare, quo phlegmone obfessa pars, tota ardet & excandescit. Quis unquam animadvertit constanti & diuturnâ observationum serie, purgationem aliquam tum per superiora tum per inferiora ægrotantibus in pares angustias adductis, salutarem contigisse, ut tacitis Naturæ monitis sanisque consiliis non audiens (quam tamen in omnibus jurat imitandam) mochlicorum ope conflagentis partis humores subtrahere aggrediatur: forte quippe hæc medicinæ eximio calore præditæ, humori jam æstuanti facies admovent, quem potius cicurare præstabat: nihil ex partis accensæ foco detrahunt, ob humoris crudi & fortiter impacti contumaciam: partes quoque sanæ & solidæ earum impetu franguntur, naturaque tota atteritur, vi direptis spiritibus, quorum ingentes copię ipsius divitiæ sunt. Non parum quoque graviter peccat in rem ægrotantium, qui ipsomet opium hisce affectibus profuturum sibi suadens, crudum, seu variis involutum modis pro libidine, devorandum præbet, quod ut insigniter calidum, aptum est potius *φλόγωσι* adaugere quam extinguere: præterea cum ex sua indole somnum conciliet, hic pestifer & exitialis in hisce malis habitus est, ut qui allapfos ad partem affectam humores silit, quæ tunc sanguine, spiritibus, & calore, intro recurrentibus, tanquam subditis ignibus omnimodè perit.

V.

QUOD est Architecto libella & linea, Nauclo in puppa sedenti clavus, id Medenti sunt Indicationes, quas cautè dirigit ad Naturæ normam, quæ cum sui juris est nec impedita, per

grandem hæmorrhagiam, abundantem hæmorrhoidum fluxum, copiosum menstruorum profluvium, sc̄ à gravissimorum morborum insultibus vindicat. Medicus Naturæ sedulus imitator & minister, dum humorum sarcinâ pressa & gravata gemit, nec sibi met ipsi valet opitulari, venit in ejus subsidium; & imperato tenuissimo vivendi modo & lege; crebro quoque refrigerantium & lenientium usu, aliisque *εὐγώγους & φεβίλους* præscriptis; per sanguinis missionem plena manu celebratam, imo ad animi deliquium, si vires constant, & cœlum, sexus, ætas & alia consentiunt, harum inflammationum causam oppugnat: hujus enim pabulum & fomes est sanguis, qui furendo & æstuando in partibus, in quibus coarctetur atque compingitur, has seditiones concitat & movet: eo evacuato cuncta tepescunt, æstus pacatur, serenitas advenit, & ægri penè omnes convalescunt. Quis quoque nescit in subitis timoribus & mœroribus, in quibus imminet suffocationis periculum, vitam esse redditam usu generosi præsidii, cujus ope sanguis & spiritus in visceribus collecti explicantur, & ab illis revelluntur. Quis non expertus est in magnis vulneribus, quæ spem salutis non adimunt, uberem cruoris ex parte læsâ profusionem; salutarem eventum celeremque sanationem portendere atque procurare. sic sanguinis detractio liberalis & tempestitiva, tanquam *ὑπερμετρώδης* præsidium ad salutem proximum & quasi compendiarium, ad hosce affectus, quorum plerique peracuti sunt, edomandos, omnibus mochlicis valentius, quibuslibet opiatīs securius præsto erit; ut cujus utilitas & opportunitas Medicinæ Principum auctoritate, traditione, usu, experientiâ, fulcitur; ratione, methodo, judicio, stabilitur.

Nunquam ergo incipientibus internis inflammationibus Morbica, & hypnotica ex opio, phlebotomia præferenda.

Domini Doctores disputaturi.

M. Pontius Mauvin.

M. Franciscus Maillard.

M. Joannes Poisson.

M. Jacobus des Prez.

M. Petrus-Paulus Ginyart.

M. Franciscus le Rat.

M. Petrus Lombard.

M. Philippus Mathon.

M. Raymondus Finot.

Proponēbat Parisiis ANTONIUS SERIN, Francopolitanus Diœcesis Ruthenensis, Baccalaureus Medicus. A. R. S. H. 1696.

Apud Franciscum Muguet, Regis & Facultatis Medicinæ Typographum.